

**Sud Bosne i Hercegovine
Суд Босне и Херцеговине****Broj; S1 3 Iž 039146 20 Iž
Sarajevo; 14.12.2020.godine****IZVORNIK!**

Sud Bosne i Hercegovine, u drugostepenom vijeću sastavljenom od sudija Srete Crnjaka kao predsjednika vijeća, Vesne Trifunović i Dinke Bešlagić Čovrk kao članova vijeća, odlučujući o žalbi Udruge Trokut sa sjedištem u Dobretićima Dobretići bb koju zastpa Jelena Grulović advokat iz Banja Luke ul. Ivana Franje Jukića broj 11 izjavljenoj na zaključak Centralne izborne komisije Bosne i Hercegovine, broj: 05-1-07-1-1333/20 od 11.12.2020. godine, o odbacivanju prigovora, na nejavnoj sjednici održanoj dana 19.10.2020. godine donio je

R J E Š E N J E

Žalba se odbija.

O b r a z l o Ź e n j e

Zaključkom Centralne izborne komisije Bosne i Hercegovine, broj i datum navedeni u uvodu, odbačen je prigovor Udruge Trokut izjavljen na tačnost objavljenih rezultata utvrđenih Odlukom o utvrđivanju i objavljivanju rezultata Lokalnih izbora u Bosni i Hercegovini 2020. godine broj 05-1-07-1-1333/20 od 05.12.2020. godine

Protiv ove odluke žalbu je blagovremeno izjavio podnosilac prigovora Udruga Trokut u kojoj je navela je prigovor odbačen na osnovu pogrešnog tumačenja zakonske d na koju se zaključak poziva. Prigovor su podnijeli birači iz izborne jedinice Dobretić od kojih je preko sto registrovalo Udrugu Trokut upravo radi zaštite njihovih prava koja su konstantno izložena kršenju i povredama. Radnje na koje prigovor ukazuje imaju obilježja krivičnog djela i kršenje izbornog prava, pa je CIK bio dužan postupati, a ne prigovor odbaciti iz formalnih razloga. Dostavljajući u prilogu rješenje o registraciji udruge predlažu da s ežalba uvaži i osporni zaključak poništi.

Centralna izborna komisija Bosne i Hercegovine dostavila je ovom sudu odgovor na žalbu u kojem je istakla da žalba nije osnovana budući da podnosilac prigovora nije birač ili politički subjekt čije je pravo ustanovljeno Izbornim zakonom povrijeđeno, a pri tome ukazane povrede su iz nadležnosti Opštinske izborne komisije Dobretić.

Žalba nije osnovana.

Iz predmeta spisa proizilazi da je na rezultate iz Odluke o utvrđivanju i objavljivanju rezultata Lokalnih izbora u Bosni i Hercegovini 2020. godine broj 05-1-07-1-1333/20 od 05.12.2020. godine Udruga Trokut izjavila prigovor koji je odbačen ožalbenim zaključkom kao izjavljen od neovlaštenog lica

Izborni zakon (Sl. glasnik BiH 23/01 sa izmjenama) u odrebi člana 6.2. propisuje da prigovor povodom povrede prava ustanovljenih tim zakonom može podnijeti birač i politički subjekt.

Udruga Trokut nema status političkog subjekta niti birača, a pri tome nije ni ovlaštena da zastupa svoje osnivače i članove povodom povrede izbornih prava.

Naime, iz rješenja Ministarstva pravosuđe i uprave Kantona Središnja Bosna broj 03-05-46/2019 od 19.02.2019. godine o upisu u registar, Udruga Trokut utvrdila je u članu 3 kao ciljeve: očuvanje i zaštita interesa pougarskog kraja, očuvanje i zaštita imovine stanovnika Pougjarja, očuvanje i promicanje kulturnih i tradicionalnih običaja Pougjarja i njegovih stanovnika, pokretanje i promicanje razvoja Pougjarja, podrška u obrazovanju i stručnom usavršavanju stanovnika Pougjarja.

Dakle, podnosilac prigovora nije registrovan i ovlašten za izjavljivanje žalbi u ime svojih članova, da bi primjenom odredbe člana 2 stav 1 tačka 4 Zakona o upravnim sporovima Bosne i Hercegovine imao pravo pokretanja upravnog spora za zastupanje kolektivnih interesa posebno kod zaštite izbornih prava budući da članovi udruge ne moraju nužno biti upisani u glasački spisak.

Odredbom člana 43 citiranog zakona propisano je da udruženje građana registrovano u skladu sa zakonom, koje prema svom opštem aktu ima zadatak da štiti određena prava i interese svojih članova, može po pristanku svog člana, u njegovo ime staviti zahtjev koji se odnosi na takva prava i interese. Međutim kod podnošenja prigovora Udruga Trokut nije dostavila ovlaštenje svojih članova za izjavljivanje prigovora, iz čega proizilazi da je postupala u svojstvu neovlaštenog lica.

Ispitujući pravilnost i zakonitost ožalbene odluke vijeće nije raspravljalo o žalbeni navodima koji se odnose na osnovanost prigovora jer su ovi navodi nerelevantni kod činjenice da je prigovor odbačen.

Obzirom na navedeno, po ocjeni ovog vijeća, pobijana odluka Centralne izborene komisije BiH je pravilna i zakonita, a žalba neosnovana, pa je istu primjenom odredbe člana 81 stav 1 Zakona o upravnim sporovima BiH (Sl. glasnik BiH br. 19/02 sa izmjenama) valjalo odbiti.

**PREDSJEDNIK VIJEĆA
S U D I J A**

Dinka Bešlagić Čovrk